

蜚階外史
全

進步書
局校印

蜚

階

外

史

上海進步書局印行

蜨階外史提要

不著撰人姓氏凡四卷襍記明清兩代遺聞軼事
大致雅馴終與龐雜者不同雖中如實爾敦圓圓
像及屬對四則陳因相襲未能獨抽奇秘然叙事
始末犁然終勝於緣飾附會有乖事實者是在讀
者之善於別擇耳

序

夫以人為鑑古者尚之記事有珠知者實之既怪力亂神之不語非嬉笑怒罵以為文事可質乎千秋說有憑於衆口正而不詭信無可疑此蛟階外史所由作也外史著作等身膾炙人口六詩三筆四達八窗好客如鄭當時不夷不惠清談勝王夷甫亦莊亦諧爰於課士之閒偶仿稗官之體我聞如是無異其詞人有不為各成厥志寓勸懲於善惡化朽腐為神奇碎亦成金聚非鑄鐵載續虞初之新志自成一家頓添日下之舊聞願書萬本

咸豐歲在閏逢攝提格陬月東泖何慶熙謹序

評跋

簡而能達清而能腴不事矜才使氣而叙事如繪狀物如生真能自成一家言者相其用筆能以微實處翻空又能於翻空處微實故不落窠臼而文情奇雋若此菱溪漫士孫肇脩謹識

古今稗官凡數十種能與閱微草堂筆記聊齋志異驂鸞者甚屬寥寥斯著卷帙無多足徵博雅而筆力運掉可挽千鈞方之草堂聊齋尤堪並美而輔世牖民勸善懲惡之意即隱存乎其間蓋多聞而直諒兼焉者矣菱溪龔莊識

蜨階外史目錄

卷一

王原

某乙

虎口奪母

于蕃

五官殉節

范節婦

文安陳氏殉節

張節女

兩烈女

王烈婦

駱六

開福寺塔

大名府署

大覺寺

廣濟寺

水泉

靈壽縣

屬對四則

鄉祠壁字

柏靈寺畫水

舊宅

劉永錫

劉倔子

看鼓樓人

某翁

郭名揚

王晴溪打盤

袁六先生

沈泰

華刺史教織

劉黃頭掘碑

謝生

田好謙

聽銀

查小山

侯達夫

趙得秀

畫猿

卷二

河帥

二則

郝雪海

劉燕庭治匪

賣花人

永年令捕盜

船戶妻

張立

木工弟

緞子王

賣竈

萬人敵

三和尚

高二爸

檻中人

少林寺僧

拳勇

竇爾敦

紀亮

何翁

劍術

二則

卿憐曲

卷三

俠女

圓圓像

蜀婦

舒鐵雲

西秀

前生

捉雞得銀

老翁贈棺

鬼仙

種沙

趙偉

李成性

柳神

王繡紱

新城寺怪

剛剛奪黍

阜城狐

黃光鬼語

西安城隍

雷神

劉某

井中女鬼

涿州狐

焦龍王

社公

芮家塋石馬

劉四先生

祁州牧

綠毛怪

宋道人

某甲

郭某

卷四

秦翁

魏奄生祠

剪絡五則

夢兆

撰著奇中三則

酌中志

楮葉集

草畫

賀副車啟

君子輒

謝疊山研

北曹墨

董宗伯書入石

寶石

怪石三則

酒

瓜瓢酒

桑皮紙

數地蘭

象尊牛鼎

工夫茶

猴兒酒

猴茶

鼓環

花瓶

又

銅鶴銅鑪

皮球

梁葫蘆

長鬚馬

青驪

牛產麟

義雁燕鴛鴦附

義犬

松鴨沙鷄

鶉

魚骨廟

蘭蠶

蛇階外史卷一

王原

文安王珣家貧困於役。逃至輝縣夢覺寺。為僧法林供炊爨二十餘年。去時。子原在襁褓。及長。問母知其故。跪辭母去。尋父。徧齊魯郊者數年。一日宿土神祠。夢古剎。日近午。見廊僧炊飯。曰。此莎米飯也。味苦。為汝澆以羹。乃肉汁也。曰甘乎。曰甘。曰如來真個來。好去還須去。驚寤。遇丈人。語以夢。丈人曰。日午南方也。莎草根附子也。調以肉汁。附子膾也。可急去。當於寺中求之。原如其言。晝行夜禱。逾月。至輝縣。雪夜宿夢覺寺門。既曉。僧離引參方丈。僧問其鄉貫。及尋父狀。呼珣使見之。不能識。珣呼原乳名。因父子相抱痛哭。僧資之歸。原生男六人。孫十有五人。曾孫二十有二人。天殆以繁衍報其孝云。李安溪相國為作王孝子詩。一時和者甚衆。

某乙

古北口外多山。山水漲發。往往漂沒廬舍。某乙者。居半山小村落。年二十餘。家有老母。授室甫年餘。生一子。某乙日採樵下山。售賣養母。一日斫柴山椒。見白氣漫天。波濤噴湧而至。念水至山半。村必不保。狂奔至家。負母疾赴山頂。比至。水已沒足。因母子慙極。高處彌望。滔滔

汨天無際。度家人盡葬魚腹矣。越日水退。負母歸。見他村盡墟。獨所居小村無恙。至家聞兒啼室中。妻炊飯方熟。因食。母問之。云他無所見。惟濃陰一日。昏暗如晝晦耳。此事得諸販羊人言之。鑿鑿。惜忘其姓名。

外史氏曰。白波浸天。死生呼吸。某乙之狂奔救母。非獨仁也。抑智且勇。嗚呼。一念之孝。鬼神呵護。妻子獲全。並澤及於一村。當其負母上山時。念豈及此耶。吁。可以知天意矣。

虎口奪母

趙瓚。柏鄉余舍村農人也。家貧。事母孝。一日出汲水。其母向院落取薪。有虎突入村。直趨瓚家。瓚歸村人遙呼曰。虎在汝家。不宜往。瓚急持柴擔踉蹌入。見虎方銜母來。奮力擊之。院宇小。虎不能轉身。又以銜人。不舍不能關。瓚與持益力。虎遂舍其母。將奔瓚。會縣胥率健勇至。射殺之。令旌其門曰純孝。

于蕃

于蕃。元城人。明嘉靖中。倭寇浙甚猖。蕃與堂弟佃以精兵應募。總督胡公宗憲令守定海舟山。與賊戰數捷。佃偶退縮。法當斬。泣曰。死所甘心。第念寡母老。又無兄弟。子呱呱在襁褓。奈何。蕃曰。弟良苦。我有二弟四子。可代也。因自縛詣軍門。胡悉其狀。義之。釋其縛。杖佃免其死。

逾年還鄉里。母得終養。里人高義。聞於有司。表其閭。

五官殉節

張力。字杠。侯崇禎丁丑進士。官萊郡司理。劉璧星。字聚五。萬曆乙卯舉人。官即墨令。范春駿。字倩美。天啟甲子。以尚書冠秋闈。官崇信令。李允樟。字若樞。副憲李建和子。官中書舍人。辛廣慈。字航海。諸生。皆東明人。甲申。明社既屋。東明令宵遁。三月。偽官王秉純入據胥程。抱六虎而翼之。荼毒薦紳慘甚。會清國定鼎。五人於五月望日。刑牲誓衆。各率蒼頭十餘人。持挺鉞擊賊。至署。力引佩刀決賊首。抱六等懼禍。密與偽部總張夢熊歃血謀反。囚五人。送懷慶。偽將軍劉宗敏營。五人不屈。慷慨罵賊死。

外史氏曰。五人雖死。至今凜凜有生氣。後之仕而鄉居者。可以興矣。

范節婦

吳橋范大司馬妹。名景姒。歸同邑王世德。以應試卒京師。范將殉。有子在襁褓。乃忍死撫孤。范讀書明大義。工詩。兼通書畫。畫大士像尤精。後以避亂卒於司馬官邸。子孫錫。歲貢。孫作肅。康熙乙卯舉人。官南宮縣教諭。曾孫履吉。康熙辛卯舉人。官中書。後人蒐輯遺稿。刻永玉齋集一卷。

文安陳氏殉節

崇禎十年。文安兵變。西馬頭陳氏舉族登舟。甫解纜。兵突至。舟中婦女投水死者。平度州知州陳所問妻王氏。永州府推官陳國維妻王氏。蒲城縣令陳國籌妻苗氏。生員陳國範妻王氏。並十五歲女。生員陳國算妻井氏。恩生陳國史妻劉氏。並十五歲女。崇明縣令陳慎妻姜氏。戶部侍郎陳協妻王氏。陳所有妻田氏。陳愜妻紀氏。生員陳愔妻井氏。生員陳悌妻紀氏。庠生陳陞妻張氏。貢生陳忾妻王氏。廕生陳怙妻王氏。生員陳惺妻程氏。共十八人。同時畢命。甲申之變。宛平查氏死者七人。一時題詠甚衆。陳氏死者較多。乃泯泯無傳者。然冰心烈魄。千載猶芳。故自不可沒也。

張節女

張某青縣人。康熙間。流寓東光。有女及笄。明慧纖麗。東光馬德聘為婦。張既得聘。慮無嫁資。其妻曰。女艷若此。攜而逃。再受聘。且得重金。張惑其言。全家逸去。女陰以為不可。泣諫父母。咸唾罵曰。將行嫁汝貴家。衣錦饜梁肉。顧不安樂。乃欲從窶人子。終身操作耶。女知不可挽。回乃潛易檻樓衣。塗面為乞人婦。手足皸繭。星夜匍匐至東光。詢馬氏居。詣之。馬故有母。問所從來。告之故。母雨泣曰。苦吾新婦矣。盥而視之。光可以鑑。乃命子鳴之官。令拘張至。訊得

背盟狀。懲之。具鼓吹送女。與馬合卺焉。

兩烈女

榮姑。文安縣馬頭村李氏女。婢曰春華。姓陳氏。相依數年。視如姊妹。行春華亦盡心事。主榮姑幼。字朱氏子。朱官于浙。壻隨往。十餘年。音問斷絕。女待字年逾三十矣。父母在時。撫育之。有兄無賴。畧不過問。二老相繼死。女饘粥不給。且患痿痺。仰婢十指為活。女兄以博債急。將鬻婢以償。婢戀主不肯去。撻之女。護婢。並撻女。血狼籍不能堪。主婢謀曰。與其分離而死。何如並命之。為愈乎。夜相持大慟。密綴衣禪。門臨大河。遲明偕往。溺焉。梁約仙廣文右僮時寓王慶坨。為賦兩烈女行。詩云。友人手持烈女狀。勸我試作烈女歌。我無表揚風義如椽之大筆。對此涕淚空滂沱。東安最爾縣。馬頭寥落村。輜軒不恒到。奇事喧里門。春華其名穎川氏。質身隴西。供役事主人。有女字榮姑。姊妹相看無異視。榮姑幼結朱氏姻。朱即隨仕江之濱。錦字十年沈宦海。綠窗卅載虛芳春。不幸嬌姿邁疾。翁姆就撫難起立。那有然鬚視藥人。同懷經歲絕踪跡。堂前愛日沈虞淵。榮姑從此愁粥饘。但仰女紅度長日。然其煮豆仍相煎。惟有女奴如共命。十年不字扶姑病。賣珠歸後問興居。歷線閒時親祇奉。朝食低顏苦勸餐。夜眠擁被寒同夢。忽忽聲聞牆。博債急索償。謀奪執鬻婢。質錢賣絹郎。薄言逢怒哮如虎。李

揚老拳捶敗鼓。病姑匍匐遮以身。撲地梨花碎春雨。大杖小杖何紛紛。杜鵑啼血血染裙。鄉鄰畏事各閉戶。氣竭聲嘶如不聞。婢在姑遲死。婢去姑速亡。與其齋恨各分張。何如就死相頽頽。既不能如薛家紅線走堂堂。又不能如俠女竊負偕遠颺。厓門蹈海扶幼主。吾將追逐參翺翔。風許許兮雲憑憑。天陰月黑楓林青。當門巨浪如山傾。水仙羽葆來相迎。主兮婢兮同一哭。回頭猶見繡閣燈熒熒。詰朝鄰人各驚絕。奔集河干相指說。主衣鮮好密密縫。婢衣暗敝重重結。想見從容就義時。禮數不因造次滅。可憐一水鎮空明。生者何顏死者悅。昔年我作錢塘游。曹娥祠廟臨江頭。歲時村巫奏絃管。我亦躬薦蘋蘩羞。千有餘載得匹儔。彼蒼厚意君知不。假饒主姑無疾嫁。不過媵妾青衣流。孰若兩兩貞烈傳千秋。

王烈婦

王烈婦。平陰東門外縣吏賈某妻。年十九歸賈。時賈年四十。極樸誠。婦亦賢淑。頗相安。道光二十五年。定州張小坡明府樸來宰平陰縣。思風化所關。與邑中紳耆修節孝志。請旌立坊。復念幽光潛德。草野豈盡無遺。以賈吏端謹。使董其事。日出郭逐村訪問。晚歸具稿以呈。如是者半年。一日燈下屬草。婦問曰。日日探訪節婦。今幾何矣。曰。境內計有三百。自信可無遺漏。汝問多少。亦欲入志乎。婦一笑。無何賈病篤。臨終謂王氏曰。汝適吾門已近三年。夫婦之

情亦未云乖。但上無父兄。下無子姪。家無恒產。汝青年斷不必守。亦無可守。所傷者。採訪一載。成三百人節孝之名。前日戲汝入志之言。徒成虛語耳。婦聞之不答。俯首嗚咽而已。賈旋歿。親鄰來助喪。不見王氏。尋之已縊他室。時久身寒。救之無及。張公素知其貧。急捐俸治喪。並題額旌其門。紳民不期而送者百人。時節孝志已刊竣。張公作哀王烈婦詞。並傳急付梓。續入。又命石工刻名節烈坊。人咸頌張公之賢。而仰王氏之烈云。

駱六

駱六。寶坻人。幼為陶冕香師僕。師戊辰翰林。嘉慶十八年。六從主人在文穎館校書。時睿皇帝秋獵木蘭。逆賊林清勾結內監張泰。王福祿。劉得財等。作亂。京師震動。賊數人入文穎館。駱藏主人複室中。扃其戶而自索器謀拒之。苦無械。乃折棹足持與鬪。賊削以刀。斷四指。暈而仆。賊入室。虛無人。遂去。時阜隸數人伏草中。賊去。乃出。閉館門。師與諸人共守之。時賊寇白巾。持白旗。徧牆上皆是。成皇帝方為阿哥。手發火槍禦之。連斃執旗賊二名。天陡陰。雷雨交作。賊恍見武帝持刀指揮。城內外兵勇紛集牆上。賊皆鳥獸散。倉卒之間。圍立解。睿皇帝回鑾。董文恭公誥力請還宮。人心遂定。冕香師在館與隸數人。日食糜一餐。已三日矣。聞有叩門者。乃出。而駱殊未死。移歸寓。漸蘇。師厚待之後。每陞見成皇帝。輒問義僕駱六尚在否。

師養之終其身。予嘗問當時形狀述之如繪。復曰。我一細民。徒以一時報主之誠。遂忘其身。即令畢命草莽。與螻蟻何殊。乃屢蒙天語垂詢。復蒙主人奉養恩。不以僕隸視。其榮多矣。其人誠樸。無他長。不能為一切機械。變詐習故。臨難忠奮。有古人風。年七十。卒於家。子滿倉。家有田二頃。皆主人所賜也。

開福寺塔

景州古塔。在治西北開福寺。累十有三級。高二十二丈。濶八丈。上嵌鐵籠銅瓶。下安瑜欄石砌。內築階甃。螺旋而登。洞門四闕。望數十里。北方浮圖。無有逾者。第一層甃刻光祿寺丞知冀州脩縣事。兼兵馬常諤臣記。時大宋元豐二年。己未歲五月初十日。同施縣君李氏等。男環琦。球。琥等。知脩縣事。常諤臣書。又南面甃刻河間路脩縣開福寺重脩釋迦文殊舍利塔記。大元至治三年八月十五日。按景州在東漢曰脩縣。隋改脩縣。宋元因之。舊志云。塔下傳有海眼通潮。故覆以大石板。近代石損。發視狀如覆斗。砌以五色石。極工緻。中有方臺。圓小石佛千數。蓋昔以藏舍利者。明正統二年。知州劉深甃刻。則云觀相輪鐵券。肇自北宋元祐某年。始克成工。豈始脩在元豐。訖功在元祐歟。經緯集云。宋與契丹畫白溝為界。守臣皆密修邊備。或治灤泊以限戎馬。或起浮圖以遠眺望。蓋不使敵人覺。特假以潛為之備。故時有